

Redaksioneel

Hierdie is die laaste nommer van *In die Skriflig* wat deur ondergetekende hanteer sal word. “Daar is ’n tyd om te kom en daar is ’n tyd om te gaan” – só sou ’n mens op die Prediker wou uitbrei. Tans is dit tyd om te gaan – na veertien jaar.

Die eerste redakteur van *In die Skriflig* was dr. K.S. van Wyk de Vries (1966-1969), opgevolg deur prof. B. Spoelstra (1970-1986), waarna ondergetekende oorgeneem het (1987-2000).

Dit was veertien boeiende en opwindende jare waarin *In die Skriflig* gestreef het “na die beoefening en uitbouing van die reformatoriese teologie op ’n wetenskaplik verantwoorde wyse tot diens van die kerk en die koninkryk van God”. In ’n sekere sin was dit vir ons blad ’n bloeiperiode. In 1990 is akkreditering verkry en in hierdie tyd is ’n administratiewe kantoor onder leiding van mev. Mariana Venter gevestig waarvan enige redakteur alleen maar kan droom. *In die Skriflig* is tans ’n goed gevestigde blad wat ’n waardige plek langs ander Suid-Afrikaanse teologiese tydskrifte inneem en ook wye belangstelling geniet.

In die Skriflig het onbeskaamd uitgekom vir sy “reformatoriese benadering”, maar daarmee saam ook ondubbelsinnig kant gekies vir ’n “wetenskaplik verantwoorde wyse” van teologiebeoefening. *In die Skriflig* wil geen ghetto-teologie beoefen wat net vir enkele mense van waarde is nie, maar ’n teologie wat diensbaar is aan die kerk én die koninkryk van God in (veral) Suidelike Afrika. Aan die ander kant het *In die Skriflig* ook die gevare van modernisme en postmodernisme probeer onderken en daarteen gewaarsku.

Tydens die jaarvergadering van die GTV in Augustus vanjaar is van die hoofredakteur afskeid geneem en ’n nuwe redaksie goedgekeur. Die nuwe hoofredakteur is prof. Fika van Rensburg en die nuwe sub-redakteur prof. Koos Vorster. Ons weet dat ons blad aan ervare en bekwame hande toevertrou word. Twee nuwe lede is by die bestaande redaksie gevoeg, naamlik prof. Francois Viljoen en dr. Henk Stoker (lg. namens die GTV). Ons wens die nuwe redaksie, en in besonder die nuwe redakteur, die seën van die Here toe en ons weet dat ons met vertroue na hulle hantering van ons blad kan uitsien.

Ek is dankbaar om tydens hierdie millenniumwending die blad op ’n hoogtepunt aan opvolgers te oorhandig.

Ten slotte enkele woorde van dank.

- Aan die redaksie vir hulle hartlike samewerking; in besonder aan prof. Fika van Rensburg as subredakteur.
- Aan die kantoorpersoneel, en in besonder aan Mariana Venter, vir heelhartige ondersteuning en werk van baie hoë gehalte.
- Aan die Koördineringskomitee, en veral prof. Annette Combrink as voorsitter, vir aangename vergaderings.
- Aan die Gereformeerde Teologiese Vereniging, met dr. Douw Breed as voorsitter, vir volgehoue morele ondersteuning.
- Aan Gereformeerde kerke vir belangstelling en ondersteuning.
- Aan die PU vir CHO, en in besonder prof. Albert Viljoen (viserektor), vir lojale onderskraging.
- Aan elke skrywer en intekenaar wat *In die Skriflig* op die hart dra.

Ten slotte kom al ons lof en dank aan ons Here God toe. Dis Hy wat ons klein menslike (ook wetenskaplike) pogings diensbaar maak vir die koms van sy koninkryk in Suid-Afrika. Aan Hom kom al die eer en lof en dank toe. Uit Hom, deur Hom en tot Hom is alle dinge.

Amie van Wyk

11 Augustus 2000